

## **La Mocedá Comunista coles trabayaores en llucha**



*Siero, 4 de Payares de 2017*

La situación que se vien viviendo n'Asturies dende los años de la desindustrialización ye grave a más nun poder, siendo continuos los casos d'empresas que cierran o que quieren despidir a trabayaores o empeorar les sos condiciones llaborales. Faciendo frente a esto nun falten les lluches obreres defendiendo un futuru y unos puestos de trabayu dignos.

Nesta temporada tan desendolcándose conflictos en delles empreses n'Asturies. Ye'l casu de CAPSA, na que les trabayaores de la fábrica de Granda entamaron una fuelga indefinía pol bloquéu de la empresa al conveniu colectivu y pola falta d'inversión na planta, dexando poco futuru a los puestos de trabayu n'Asturies.

Otres trabayaores que tán teniendo que salir a la cai polos sos derechos son les de los supermercaos El Árbol, que, después de que DIA comprare la empresa, tán viendo cómo se cierran les tiendas onde trabayaben y se-yos imponen unos tresllaos inasumibles colos salarios que tienen.

Dos casos más que tamién son bien conocíos son los de Duro Felguera y les empreses auxiliares d'ArcelorMittal. Nel primeru d'ellos, la compañía alcuéntrase nuna situación cercana al concursu d'acreedores, poniendo el peligrosu los empregos que tien n'Asturies, y a les trabayaores nun-yos queda otra que facer presión pa intentar nun salir perxudicaes. No tocante a Arcelor, a parte de la plantiya de les empreses auxiliares ta aplicándose-y un conveniu menos favorable que'l que-y correspuende, polo que los sindicatos yá tan entamando coles movilizaciones necesaries pa reclamar los derechos d'estes trabayaores.

Dende la Mocedá Comunista damos tol nuesu sofitu a les trabayaores d'estes empreses y a toles que n'Asturies tán lluchando pol so puestu de trabayu. Ye preciso señalar que nun se trata de casos aislaos, sinón que ye algo qu'afeuta a tolos sectores y que lo fai de continuo, y hai una constante: la que sufre ye la clas obrera. Dende'l desmantelamientu de la industria asturiana impuestu pola Xunión Europea, cola complicitá de los partíos del Réxime, como'l PSOE, tamos viendo como nun se dio una alternativa pa vivir y trabayar n'Asturies, y como toles empreses van desapareciendo cuando se van acabando les sovenciones y les rentes d'aquella industria. El problema ye estructural, los intereses de les empreses y de gobiernos al so serviciu son opuestos a los intereses del pueblu asturianu, y por eso tienen toles trabayaores qu'organizase pa construir una Asturias na que poder vivir con dignidá.